

HBk presoen auzian «maila aktibora» pasatzeko eskatu die EAJ, EA eta IUri

Ekainaren 19an, 22:30etan, 'burrumba nazionala' antolatu du sakabanaketaren aurka

Presoen sakabanatzearen kontra agertu diren alderdiei, EAJ, EA eta IUri, auzi horretan «maila aktibora» pasa daitezen dei egin zien atzo HBk. Helburu horrekin egiten diren mobilizazioetan kalera irteteko eskatu zien alderdi horiei, eta HBk, ekainaren 19rako Senideek antolatu duten lanuztearekin bat egiten duela jakinarazi zuen.

Axun Erzibengoa / Donostia

EUSKAL presoen sakabanatzearen aurka gero eta jende multzo handiagoa dagoela iritzi dio HBk, eta multzo hori aktibatu beharra azpimarratu zuen atzo eskaintako prentsaurrekoan. Presoen eskubideen aldarrikapenarekin jada gizarteko sektore zabalek bat egin dutela azaldu zuen Jon Gorrotxategi Mahai Nazionalako kideak. «Espetxeetako egoera zein larria den ikusita, posizionamendua ez dela nahikoa uste dugu. Maila aktibora pasatzeko unea da».

Ildo horretatik deialdi zehatza egin zien HBk zenbait alderdiri. «Sakabanaketaren aurka azaldu diren alderdiei eskatzen diegu maila aktibora pasatzeko. Uste dugu EAJk, IUK eta EAK badutela erantzukizunik». Gizarteko sektoretatik askotan dei egin zaie alderdi horiei HBk dioenez, eta beren ustez bada garaia mobilizazioei atxikimendua azal diezaieten. Adibide gisa jarri zuten asteburu honetan Tolosan egingo den mobilizazioan elkarrekin izango direla.

Hilaren 19an Senideak elkarrekin presoan alde ordu laurdeneko lanuztea antolatu du, eta HBk

deialdi horrekin bat egiten duela esan ostean, aipatu alderdiei deialdi horrekin bat egin dezaten eskatu zien. «Sakabanaketaren kontra dauden sektore guztiei dei egiten diegu kalera irten daitezen, eta erakutsi diezaieten ez daudela ados Madrildik inposatu nahi duten errepresioarekin». Lanuztea 12:00etatik 12:15era izango da.

'Burrumba nazionala' • Horretaz gain, arratsaldean HBk eta herrietako plataformak eta beste-lako taldeek antolatuta, manifestazioak izango direla, eta haietan parte hartzeko eskatu zuen. Azkenik, egun horretarako HBren ekarpen konkretua ere azaldu zuen Gorrotxategi: ekainaren 19an gaueko 22:30etan burrunba nazionala egingo du. «Jendeari eskatzen diegu kalera

irten dadin zarata egitera, presoan aldarrikapena, inoiz baino ozenago, Madrilen entzun dezaten». Burrumba horrek ere ordu laurdeneko iraupena izango du.

Presoak Euskal Herriratzeko aldarrikapenarekin jada gizartearen gehiengoak eta alderdirik gehienak bat egin dute, HBk dioenez. Hala ere, PPK ez duela ezer aldatzeko itxurarik erakutsi eta horregatik alderdi horri presio egin behar zaiola azaldu zuen Gorrotxategi. Presioa areagotzeko beharraz mintzatu zen; horrela, ekimen instituzionalak beharrezkoak direla azaldu zuen, baina batez ere gizartearen mobilizazioa aipatu zuen presiobide gisa. «Ikusten dugu PPK zer-nolako mesprezuz eta zabarkeriaz erantzuten dien ekimen instituzionalak», azaldu zuen.

Juan Joxe Petrikorena Mahai

Nazionalako kideak sakabanaketa hasi zenetik 3.665 egun baino gehiago pasatu direla gogoratu zuen. Gizartearen aldetik eta presoan aldetik egoera gainditu nahian ahaleginak egin direla azpimarratu zuen. Ildo beretik, ETaren kartzela fronteko su-etena aipatu zuen, eta su-etan hori egonik PPK aitzakiarik ez duela esan zuen. «Espainiako Gobernuak justiziaren zampaketan oinarritzen du bere politika, eta gizarteari iruzur egiten dio», esan zuen Petrikorena. PPK ez duela ezer egin nahi azaldu nahi dio gizarteari, baina HBko ordezkariaren iritziz gizarteak argi eta garbi utzi du presoan aldarrikapenarekin aurrera jarraitzeko, eta adibide gisa aipatu zituen Senideek Gasteizen eginiko enkartelada eta Iruñean egiten ari diren gose greba. x



Jon Gorrotxategi eta Juan Joxe Petrikorena, HBko Mahai Nazionalako kideak, atzoko prentsaurrekoan.

EDURNE KOCH

Espainiatik kanpo zein Espainian dauden presoekin jarrera bera izateko eskatu du EAJk

■ Espainiatik kanpo dauden preso espainiarren egoera hobetzeko egin eskaerari erantzundio horrela

Erredakzioa / Donostia

EAJ-KO eta euskal senadore abertzaleen taldeko kide Imanol Bolinagak ondoko eskaera defenditu zuen Senatuan: «Espainiatik kanpo diren espainiar presoentzat proposatzen duten irizpide bera izan dezatela Espainiako kartzelatan dauden presoek buruz ari direnean».

Talde Sozialistak atzerrian dauden preso espainiarren bizi-baldintzak hobetzeko eskatuz aurkeztu mozioaren ildotik egin zituen Imanol Bolinagak adierazpen horiek. EAJko senadoreak, hala ere, sozialistek aurkeztutako mozioaren eduki eta helburuak bultzatzen dituela azpimarratu nahi izan zuen.

Bolinagaren iritziz, ordea bada oinarritzko antzekotasunik atzerrian dauden preso horien eta Estatuan preso daudenen artean.

Bergizarteratzea helburu hartuta, nahitaezkoa da, Bolinagaren ustetan, presoak ahal den neurrian bere ingurune familiar edo sozialetik ahal den hurbilen izatea.

Testuinguru horretan, Europako Legebiltzarrak 1997an onartu zuen erresoluzioa ekarri zuen gogora. «Espetxeratzea, familia eta bere ingurune sozialetik ahalik eta hurbilen izan behar duela esaten da bertan. Hori da gure taldeak preso guztientzat eskatzen duena», gaineratu zuen. x

Euskal apaizen bisita izan zuten gose grebalariek

■ Gaur HBko nafar parlamentarioak joanen zaizkie

Erredakzioa / Iruñea

JOAN DEN larunbatz geroztik euskal presoak Euskal Herrira ekar ditzaten eskatzeko Iruñeko San Lorentzo elizan baraualdian dauden Senideak taldeko sei kidek Euskal Apaizen Koordinakundeko kideen bisita izan zuten atzo. Elizara bederatzi apaiz joan ziren, eta gose grebalariekin solasean aritu ziren ordubate. Apaizek euren elkartasuna adierazi ondotik, maiatzaren 19an hasi dinamikaren berri eman zieten baraualdikoek. Orduan, Gasteizko Parlamentuaren aurrean eskatu zuten hango Giza Eskubideen Batzordeari duela bi urte onartutako erabakia gauzatzen

hasteko. Nafarroan ere presoak badirenez, eskaera bera egiten dute. Gasteizkoa pausoak ematen hasi arren, Nafarroakoak ez du erabakirik hartu.

Era berean, Senideek behin baino gehiagotan batzordearekin bilerak egiten saiatu arren, ez du bildu nahi izan. Ildo horretan, herenegun Foru Komunitateko parlamentarioei San Lorentzo elizara joateko eskatu zieten. Deialdiari HBk bakarrik erantzun dio. Ezker Abertzaleko kideak gaur goizeko 10:30etan joanen dira.

Grebalariei dagokienez, Silvia Salamancak esan zuen, urdailean tristura eta nekea agertzen hasiak badituzte ere, animoa oso goian dutela. x



Apaizen Koordinakundeko kideak, atzo Iruñean gose grebalariei eginiko bisitan.

JOXE LACALLE